

**«ТАСДИҚЛАНГАН»**  
**“UzAssets investitsiya kompaniyasi” АЖ**  
**Кузатув кенгаши мажлисининг**  
**2023 йил 11 октябрдаги**  
**4-сон баённомаси билан**

**“UzAssets investitsiya kompaniyasi”**  
**акциядорлик жамияти Кузатув кенгашининг**  
**Коррупцияга қарши курашиш ва этика**  
**қўмитаси тўғрисида**  
**НИЗОМ**

**Тошкент – 2023 йил**

## Мундарижа

I. УМУМИЙ ҚОИДАЛАР.....	3
II. КОРРУПЦИЯГА ҚАРШИ КУРАШИШ ВА ЭТИКА ҚЎМИТАСИНING ТАРКИБИ .....	3
III. КОРРУПЦИЯГА ҚАРШИ КУРАШИШ ВА ЭТИКА ҚЎМИТАСИНING АСОСИЙ ВАЗИФАЛАРИ .....	4
IV. КОРРУПЦИЯГА ҚАРШИ КУРАШИШ ВА ЭТИКА ҚЎМИТАСИНING МАЖЛИСЛАРИНИ ТАШКИЛ ЭТИШ ВА ЎТКАЗИШ ТАРТИБИ.....	5
V. КОРРУПЦИЯГА ҚАРШИ КУРАШИШ ВА ЭТИКА ҚЎМИТАСИ АЪЗОЛАРИНИING ХУҚУҚ ВА МАЖБУРИЯТЛАРИ .....	6
VI. КОРРУПЦИЯГА ҚАРШИ КУРАШИШ ВА ЭТИКА ҚЎМИТАСИ АЪЗОЛАРИНИING ЖАВОБГАРЛИГИ .....	8
VII. ЯКУНЛОВЧИ ҚОИДАЛАР .....	8

**“UzAssets investitsiya kompaniyasi” акциядорлик жамияти**  
**Кузатув кенгашининг Коррупцияга қарши курашиш ва этика**  
**қўмитаси тўғрисида**  
**НИЗОМ**

**I. Умумий коидалар**

1. Мазкур Низом (кейинги ўринларда – Низом) Ўзбекистон Республикасининг “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги, “Коррупцияга қарши курашиш тўғрисида”ги қонунларига, Ўзбекистон Республикаси Президентининг 2022 йил 8 апрелдаги “Тадбиркорлик муҳитини яхшилаш ва хусусий секторни ривожлантириш орқали барқарор иқтисодий ўсиш учун шарт-шароитлар яратиш борасидаги навбатдаги ислохотлар тўғрисида”ги ПФ-101-сон Фармони, Вазирлар Маҳкамасининг 2021 йил 29 мартдаги 166-сон қарори билан тасдиқланган “2021-2025 йилларда давлат иштирокидаги корхоналарни бошқариш ва ислох қилиш стратегияси”га, “UzAssets investitsiya kompaniyasi” акциядорлик жамиятининг (кейинги ўринларда – Жамият) Уставига, Кузатув кенгаши тўғрисидаги Низомга ва бошқа ҳужжатларига мувофиқ ишлаб чиқилган.

2. Ушбу Низом Кузатув кенгаши Коррупцияга қарши курашиш ва этика қўмитасининг (кейинги ўринларларда – Қўмита) ҳуқуқий мақомини, таркибини, ваколатларини ва ишлаш тартибини белгилайди.

3. Қўмита энг муҳим масалаларни кўриб чиқиш ва Кузатув кенгашига тавсиялар тайёрлаш учун Кузатув кенгашининг қарори асосида ташкил этилади. Қўмита Кузатув кенгашининг доимий фаолият юритувчи ишчи органи ҳисобланади.

4. Қўмита ўз фаолиятини қонунчилик, Жамият Устави, Кузатув кенгаши тўғрисидаги низом ва мазкур Низомга асосан амалга оширади.

**II. Қўмитанинг таркиби**

5. Қўмита фақат Кузатув кенгашининг аъзоларидан 3 (уч) кишидан иборат таркибда ташкил этилади. Қўмита таркибига камида бир нафар Кузатув кенгашининг мустақил аъзоси киритилиши шарт.

6. Қўмита аъзолари Кузатув кенгаши раисининг тавсияси асосида Кузатув кенгаши аъзоларидан уларнинг ваколат муддати даврига кўпчилик овоз билан сайланади. Қўмита раиси Қўмита аъзолари орасидан Кузатув кенгаши томонидан тасдиқланади. Қўмита раиси Кузатув кенгашининг раиси бўлмаслиги лозим.

7. Қўмита таркибига сайланган Кузатув кенгаши аъзолари чекланмаган тарзда қайта сайланиши мумкин.

8. Қўмита аъзолари Қўмита фаолиятининг йўналишлари ва соҳаларига доир малака ва тажрибага эга бўлиши лозим.

9. Қўмитага раҳбарлик қилиш ва фаолиятини ташкил этиш Қўмита раиси томонидан амалга оширилади. Қўмита раисининг вақтинчалик йўқлигида раис вазифасини бажариб туриш Қўмита аъзоларидан бирига юклатилиши мумкин.

10. Қўмита аъзолари ўртасидаги функциялар тақсимланиши Қўмита раиси томонидан амалга оширилади.

### **III. Қўмитанинг асосий вазифалари**

11. Қўмитанинг асосий вазифалари қуйидагилардан иборат:

коррупцияга қарши курашиш тўғрисидаги қонунчилик ва коррупцияга қарши курашиш давлат дастурларига мувофиқ, Жамиятнинг тегишли чора-тадбирлар дастури ва ички норматив ҳужжатларини ишлаб чиқиш;

Жамиятда коррупцияга қарши курашишнинг муҳим тамойилларига риоя этилишини таъминлаш чораларини кўриш;

Жамиятнинг барча фаолият соҳаларида коррупциявий хавф-хатарларни камайтириш ва коррупцияга барҳам бериш чора-тадбирларини ишлаб чиқиш ва барҳам бериш;

Жамиятнинг мансабдор ходимлари томонидан коррупцияга қарши курашиш тўғрисидаги қонунчилик ва Жамиятнинг ички норматив ҳужжатлари талабларига риоя этилишини назорат қилиш;

Жамият ходимларининг ҳуқуқий онги ва маданиятини ошириш, Жамиятда коррупцияга нисбатан муросасиз муносабатни шакллантириш чора-тадбирларини ишлаб чиқиш ва амалга ошириш;

Жамиятда мунтазам равишда коррупцияга қарши курашиш фаолиятини мониторинг ва таҳлил қилиш ҳамда унинг самарадорлик ва натижадорлик кўрсаткичларини баҳолаш;

Жамиятнинг мансабдор ходимлари фаолиятининг шаффофлиги ва ҳуқуқ-атвор меъёрларига мувофиқлигини таъминлаш;

Жамиятда ходимларнинг ҳуқуқ-автор қоидаларини ишлаб чиқиш, уларга риоя этилишини таҳлил қилиш ва таъминлаш;

Жамият фаолиятининг шаффофлиги ва маълумотларнинг ошкор қилиниши етарли даражада ва аниқ эканлигини кўриб чиқиш;

Жамиятнинг йиллик ҳисоботи ва бошқа ҳужжатларига киритиш учун Қўмита фаолияти натижалари тўғрисида ҳисобот тайёрлаш ва тақдим этиш;

Жамиятнинг коррупцияга қарши ички назорат тузилмаси фаолиятини

мувофиқлаштириш;

Кузатув кенгаши томонидан юклатилган бошқа вазифаларни бажариш.

#### **IV. Қўмита мажлисларини ташкил этиш ва ўтказиш тартиби**

12. Қўмитанинг навбатдаги мажлислари ҳар ойда ёки ҳар чоракда бир маротаба ўтказилади. Қўмитанинг навбатдан ташқари мажлислари Ягона акциядор, Кузатув кенгаши, Қўмита аъзоларининг талаби билан, Бошқарув аъзолари ёки ички назорат хизматининг сўровига кўра чақирилади.

13. Қўмита аъзолари Қўмитанинг мажлисларида шахсан қатнашишлари шарт. Агар мажлисда қатнашиш имконияти мавжуд бўлмаса, Қўмита аъзоси сабабларини кўрсатган ҳолда Қўмитани бу ҳақда хабардор қилади. Бунда Қўмита мажлиси кун тартибидаги масалаларни муҳокама қилиш ва овозга қўйилган масалалар бўйича қарорлар қабул қилишда масофадан туриб иштирок этиш имкониятини берадиган ахборот-коммуникация технологияларидан фойдаланган ҳолда ўтказилиши мумкин.

14. Қўмита аъзолари муайян масаланинг кечиктирилмай ҳал этилишини талаб қиладиган ҳолатлар юзага келган тақдирда Қўмитанинг шошилиш мажлиси чақирилишини талаб қилишлари мумкин.

15. Қўмита аъзолари Бошқарув аъзоларини ва бошқа шахсларни Қўмита мажлисларига қатнашиш учун таклиф қилиши, шунингдек зарур бўлганда улардан ахборот талаб қилиши мумкин.

16. Қўмита ўз мажлисларини Кузатув кенгаши мажлисларидан олдин ўтказиши мумкин.

17. Қўмита раиси Қўмита мажлисидаги барча иштирокчиларга уни лозим даражада ўтказишга тайёргарлик кўриш ва унда олиб чиқилган масалаларни муҳокама қилишда фаол иштирок этиш имкониятларини яратади. Қўмита аъзолари Қўмита мажлисларини ўтказишга тайёргарлик кўриши ҳамда уларда иштирок этиш учун етарли даражада вақт ажратишлари лозим.

18. Қўмита мажлисида Қўмита аъзоларининг камида 2/3 қисми иштирок этса, мажлис ваколатли ҳисобланади, бунда Қўмита раиси иштирок этиши шарт.

19. Қўмитанинг мажлисида қарор, агар Жамият Уставида ўзгача қоида назарда тутилмаган бўлса, мажлисда иштирок этган Қўмита аъзоларининг кўпчилик овози билан қабул қилинади.

20. Қўмитанинг мажлисида масалалар ҳал этилаётганда Қўмитанинг ҳар бир аъзоси битта овозга эга бўлади. Овозлар тенг келган тақдирда, Қўмита раисининг овози ҳал қилувчи ҳисобланади. Қўмитанинг қарорига розилик билдирмаган Қўмита аъзоси ўзининг мажбурий тартибда мажлис баённомасига илова қилинадиган алоҳида фикрини қайд этиб қўйиш ва уни Кузатув кенгаши

эътиборига ҳавола қилиш ҳуқуқига эга.

21. Қўмитанинг қарори Қўмита мажлисининг баённомаси билан расмийлаштирилади. Қўмита мажлисининг баённомаси мажлис ўтказилганидан сўнг 10 (ўн) кундан кечиктирмай тузилади. Ушбу баённома мажлисда иштирок этган Қўмита аъзолари томонидан имзоланади.

22. Қўмита мажлисининг баённомаси Жамиятнинг Корпоратив котиби ёки Қўмита аъзолари тайинлаган шахс томонидан юритилади.

23. Қўмита раиси:

Қўмитанинг ишини ташкил этади;

Қўмита мажлисларини чақиради ва уларда раислик қилади;

Қўмита мажлисларида баённома юритилишини ташкил этади;

Жамият ички норматив ҳужжатлари ва мазкур Низомда назарда тутилган бошқа ҳаракатларни амалга оширади.

24. Қўмита мажлисининг баённомасини юритувчи котиб:

Қўмита мажлислари баённомаларини юритади ва расмийлаштиради;

Қўмита томонидан кўриб чиқилиши учун кун тартибидаги масалалар бўйича материалларни тайёрлайди ва тақдим қилади;

Қўмитанинг қарорларини, хулосаларини ва баённомаларини олувчиларгача етказилади.

25. Қўмита ваколати доирасида қабул қилинган барча қарорлар Бошқарув аъзолари ва бошқа мансабдор шахслари, шунингдек ички назорат тузилмалари учун бажарилиши мажбурийдир.

26. Қўмита қарорларида кўрсатиб ўтилган мансабдор шахслар қарорнинг ўз вақтида ҳамда қарор ижросига мос равишда бажарилишига шахсан жавобгардирлар.

27. Қўмита қарорлари ижросини назорат қилиш Қўмита раиси томонидан амалга оширилади.

## **V. Қўмита аъзоларининг ҳуқуқ ва мажбуриятлари**

28. Қўмита аъзолари қуйидаги ҳуқуқларга эга:

Бошқарув аъзоларидан ва Жамиятнинг бошқа мансабдор шахсларидан ўз фаолияти учун керакли барча ҳужжатларни ва материалларни тақдим этишни талаб қилиш;

агар Жамиятга жиддий моддий зарар етказилишига олиб келган

ёки етказилишига олиб келиши мумкин бўлган қоидабузилишлар аниқланса, Кузатув кенгаши мажлиси чақирилишини талаб қилиш;

Жамиятнинг таркибий бўлинмалари ходимлари, шу жумладан

раҳбарларидан кўриб чиқиладиган масалалар бўйича изоҳлар талаб қилиш;

айбдор ходимларни интизомий, мулкӣ ва бошқа турдаги жавобгарликка тортиш масалаларини Кузатув кенгашига кўриб чиқиш учун тақдим қилиш;

Жамиятнинг дастлабки бухгалтерия, молия ва бошқа ҳужжатларидан фойдаланиш;

Қўмита ваколатлари доирасидаги қарор ва топшириқларни бажариш, Қўмита ваколатига кирувчи масалаларни муҳокама қилиш мақсадида зарур ҳолларда Қўмита раиси қарори билан Кузатув кенгаши ва Бошқарув аъзоларини, Жамиятнинг мансабдор шахсларини Қўмита мажлисларига иштирок этиш учун таклиф этиш;

Қўмита фикрига кўра масалани чуқурроқ ўрганилиши зарур бўлса, Қўмита ваколатига кирувчи масала бўйича ўз ташаббусига кўра, Кузатув кенгашининг бошқа қўмиталарининг фикрини талаб қилиб олиш;

Қўмита мажлисида муҳокама қилинадиган масала юзасидан регламент билан ажратилган вақт доирасида сўзга чиқиш, кун тартибидаги масалалар, қабул қилинадиган қарорлар бўйича ўзининг алоҳида фикрини Қўмита мажлиси баённомасига киритишни талаб қилиш;

Кузатув кенгаши томонидан тасдиқлаш учун мазкур Низомга ўзгартириш ва қўшимчалар киритиш бўйича таклифлар бериш;

тақдим этилган ҳужжатлар асосида тегишли хулоса ва таклифлар ишлаб чиқиш ва Кузатув кенгаши муҳокамасига киритиш;

Қўмита мажлиси кун тартибига киритиш учун масалалар таклиф қилиш.

29. Қўмита аъзоларининг мажбуриятлари қуйидагилардан иборат:

қонунчилик, Жамият Устави, мазкур Низом ва Жамият ички норматив ҳужжатлари асосида ўзига юклатилган вазифаларни бажариш ҳамда ўз фаолиятини сидқидилдан олиб бориш;

ўз вазифаларини бажаришда, ҳуқуқлари ва мажбуриятларини амалга оширишда Жамият ва Ягона акциядор манфаатларини кўзлаб иш тутиш;

этика ва коррупцияга қарши кураш соҳасида ҳамда Жамият тараққиёти учун стратегик аҳамиятга эга бўлган бошқа соҳалардаги ютуқларни кузатиб бориш;

Кузатув кенгаши мустақил аъзоси мақомидаги ҳар қандай ўзгаришлар тўғрисида ёки Қўмита томонидан қабул қилинадиган қарорлар билан боғлиқ манфаатлар тўқнашуви юзага келиши тўғрисида ахборот бериш;

Жамиятнинг тижорат ва хизмат сирларини ошкор этмаслик ҳамда махфийлик талабларини бажариш.

30. Қўмита мунтазам равишда (одатда йиллик йиғилишдан сўнг, лекин камида олти ойда бир марта) Кузатув кенгашига ўз иши тўғрисида ҳисобот беради.

## **VI. Қўмита аъзоларининг жавобгарлиги**

31. Қўмита аъзолари ўз хизмат вазифаларини бажаришда Жамиятга алоқадор ҳужжатларлардан фойдаланаётганда уларнинг махфийлигини сақлаш учун жавобгардирлар.

32. Қўмита аъзолари ўз ҳаракатлари (ҳаракатсизлиги) натижасида Жамиятга етказилган зарарнинг тўлиқ қопланиши учун жавобгардирлар.

33. Жамиятга зарар етказилишига сабаб бўлган қарорга овоз беришда иштирок этмаган ёки ушбу қарорга қарши овоз берган Қўмита аъзоси жавобгар бўлмайди.

## **VII. Яқунловчи қоидалар**

34. Мазкур Низом Кузатув кенгашининг қарори билан тасдиқланган кундан бошлаб кучга киради.

35. Қуйидаги ҳолатларда ушбу Низомга Кузатув кенгашининг қарорлари билан ўзгартириш ва қўшимчалар киритилиши мумкин:

Ягона акциядорнинг талабига кўра;

Кузатув кенгаши аъзоларининг ва Бошқарувнинг таклифларига асосан;  
ушбу Низомда назарда тутилган муносабатларни тартибга солувчи қонунчилик ҳужжатлари талаблари ўзгарган тақдирда;

Жамият Уставига ўзгартириш ва қўшимчалар киритилганда.

36. Ушбу Низомнинг айрим бандлари ўз аҳамиятини йўқотган ёки ҳақиқий эмас деб топилган тақдирда, Низомнинг бошқа бандлари ўз кучида қолади.